

## **Inkluzija za sve- Tuzlanski kanton dobija podršku za unapređenje inkluzivnih praksi za djecu s poteškoćama u razvoju**

*Potpisan Memorandum o saradnji sa 13 institucija lokalne i kantonalne vlasti u Tuzlanskom kantonu i Save the Children kojim će se omogućiti unapređenje inkluzivnog obrazovanja, uz stručnu podršku, za oko 900 djece*

Današnjim potpisivanjem **Memoranduma o saradnji sa 13 institucija lokalne i kantonalne vlasti u Tuzlanskom kantonu i Save the Children** počinje realizacija Strategije za uključivanje djece s poteškoćama u razvoju u obrazovanje sa sedmogodišnjim Planom implementacije. Strategiju i Plan usvojila je Skupština Tuzlanskog kantona u martu 2018. godine, a razvilo ju je Ministarstvo obrazovanja i nauke Tuzlanskog kantona uz podršku organizacije Save the Children.

Strategija pruža sveobuhvatne smjernice za unapređenje inkluzivnog obrazovanja korištenjem mnogih već postojećih kapaciteta u zajednicama i razvojem savremenih pristupa inkluzije, baziranim na socijalnom modelu invaliditeta.

Potpisivanje Memoranduma predstavlja jedan od ključnih dijelova realizacije projekta **Inkluzija za sve- Inkluzivno obrazovanje za svu djecu u Bosni i Hercegovini** (šifra: AID 011522) koji pruža direktnu podršku Vladi Tuzlanskog kantona za početak implementacije Strategije.

*„Ministarstvo ima višegodišnju saradnju sa organizacijom Save the Children, ali smo posebno ponosni na razvoj Strategije, asam projekat i današnje potpisivanje dio su njene implementacije. Inkluzija je temeljno ljudsko pravo, nije puko otklanjanje poteškoća,“* istakao je nakon potpisivanja Memoranduma ministar obrazovanja i nauke Tuzlanskog kantona **Zlatan Muratović**.

Projekat, kao trogodišnja inicijativa, predviđa uspostavljanje **dva Centra za razvoj inkluzivnih praksi** u općinama **Banovići** i **Gradačac**, koji će pružati savremene servise podrške djeci i porodicama, vrtićima i školama, kao i široj lokalnoj zajednici. Također, predviđa jačanje kapaciteta specijalnih škola u Tuzlanskom kantonu za proces transformacije u savremene resurse podrške, kao i osnaživanje zagovaračkih inicijativa organizacija civilnog društva u Tuzlanskom kantonu.

*„Drago mi je da ćemo kroz ovaj projekat doći do svojevrsne standardizacije i objedinjavanja inkluzivnih praksi i napora. Naša je obaveza da dovedemo ovako dobro postavljene stvari do kraja,“* izjavila je **Nermina Hadžimuhamedović**, predstavnik opštine Gradačac.

Projektom je planirano formiranje multi-sektorskog partnerstva s jedinicama lokalne samouprave, Ministarstvom obrazovanja i nauke, Ministarstvom zdravstva, Ministarstvom za rad, socijalnu politiku i povratak i Pedagoškim zavodom Tuzlanskog kantona kako bi se unaprijedio kvalitet aktivnosti i podrške, kao i implementacija Strategije za uključivanje djece s poteškoćama u razvoju u obrazovanje.

*„Inkluzija je dobrobit ne samo za djecu s poteškoćama u razvoju već i za cjelokupno društvo. Usvajanje Strategije i sedmogodišnjeg Plana implementacije su dokaz posvećenosti i spremnosti institucija na rad u ovoj oblasti. Sam projekat adresira jedan segment Strategije, a njegovom realizacijom smo na dobrom putu za uspostavljanje kvalitetnih sistemskih rješenja,“* kazala je ovom prilikom direktorica Save the Children za sjeverozapadni Balkan, **Andrea Žeravčić**.

Djeca s poteškoćama u razvoju imaju pravo da pohađaju kvalitetno obrazovanje i da budu uključena u sve aspekte društva. Ipak, u Bosni i Hercegovini mnoga su djeca i njihove porodice isključeni iz odgojno-obrazovnog procesa i ne dobivaju adekvatnu podršku u zajednici.

Projekat finansira Italijanska agencija za razvojnu saradnju (AICS), a provodi Save the Children u partnerstvu s Ministarstvom obrazovanja i nauke Tuzlanskog kantona, Centrom znanja Profectus, Univerzitetom u Bolonji i Udruženjem Vesta.

– Kraj –

Projekat je finansiran od strane Italijanske agencije za razvojnu saradnju. Informacije o projektu koje sadrži ovaj tekst su odgovornost autora. Ministarstvo vanjsih poslova Italije i Italijanska agencija za razvojnu saradnju ne preuzimaju odgovornost za mišljenja iznesena u tekstu.

Za više informacija obratite se Šejli Dizdarević putem email adrese [sejla.dizdarevic@savethechildren.org](mailto:sejla.dizdarevic@savethechildren.org) ili brojeva telefona 033 290 686, 063 640 410.

---

***Save the Children vjeruje da svako dijete zaslužuje budućnost. U zemljama sjeverozapadnog Balkana radimo svaki dan kako bismo za djecu osigurali zdrav početak života, priliku za učenje i zaštitu od nasilja. Dajemo sve od sebe za djecu - svaki dan i u vrijeme kriza – transformišući njihove živote i budućnost koja je pred nama.***



**Save the Children**